

Bosna i Hercegovina
Federacija Bosne i Hercegovine
ZENIČKO-DOBOJSKI KANTON
OPĆINA MAGLAJ
OPĆINSKO VIJEĆE



Bosnia and Herzegovina
Federation of Bosnia and Herzegovina
ZENICA – DOBOJ CANTON
MAGLAJ MUNICIPALITY
MUNICIPAL COUNCIL

Na osnovu člana 8. stav 3., člana 13. stav 2. alineja 4. i člana 36. i 37. Zakona o principima lokalne samouprave u Federaciji BiH (“Službene novine Federacije BiH”, broj: 49/06 i 51/09), člana 13. stav 1. tačka c) i stav 3. Zakona o pripadnosti javnih prihoda u Federaciji BiH (“Službene novine Federacije BiH”, broj: 22/06, 43/08, 22/09, 35/14 i 95/15) i člana 18. Statuta Općine Maglaj (“Službene novine Općine Maglaj”, broj: 8/07, 3/08 i 6/08), Općinsko vijeće Maglaj na sjednici održanoj dana 30.12.2020. godine, donosi

ODLUKU **o komunalnim taksama općine Maglaj**

I OPĆE ODREDBE

Član 1.

Ovom Odlukom propisuju se komunalne takse, utvrđuje njihova visina i određuje način plaćanja na području općine Maglaj.

Član 2.

(Osnovi za plaćanje takse)

Na području općine Maglaj propisuje se i naplaćuje komunalna taksa za:

1. Svaku istaknutu firmu,
2. Izvođenje i držanje muzike uživo u ugostiteljskim objektima,
3. Privremeni boravak u hotelima i drugim ugostiteljskim objektima registrovanim za odmor i noćenja,
4. Isticanje objava, oglasa i saopštenja na javnim mjestima,
5. Držanje sredstava za priređivanje zabavnih igara (bilijar, videoigre, fliperi, pikado automati, karte za igru, poker aparati, ruleti, aparati za posebne igre na sreću, i slično),
6. Zauzimanje prostora i trotoara ispred poslovnih objekata.
7. Korištenje uređaja za pružanje usluga mobilne telefonije i elektroenergetskih objekata kojim se vrši prenos električne energije - trafostanice.

Član 3. (Definicija pojmova)

U smislu ove Odluke:

1. pod istaknutom firmom podrazumjeva se ime pod kojim pravno ili fizičko lice posluje,
2. pod izvođenjem i držanjem muzike uživo u ugostiteljskim objektima podrazumjeva se povremeno ili svakodnevno izvođenje muzičkog programa uz pružanje ugostiteljskih usluga,
3. pod privremenim boravkom u hotelima i drugim ugostiteljskim objektima registrovanim za odmor i noćenja podrazumjeva se privremeni boravak do 30 dana u objektima, registrovanim za odmor i noćenja te kod građana koji izdaju sobe –ležaje,
4. pod isticanjem objava, oglasa i saopštenja na javnim mjestima podrazumjeva se isticanje plakata, panoa, postavljanje stalnih panoa, billboard reklamni panoa i display-a na javnim mjestima određenim za te namjene,
5. pod držanjem sredstava za priređivanje zabavnih igara (bilijar, videoigre, fliperi, pikado automati, karte za igru, poker aparati, ruleti, aparati za posebne igre na sreću, i slično) podrazumjeva se držanje aparata kojima se omogućava priređivanje zabavnih igara i igara na sreću,
6. pod zauzimanjem prostora i trotoara ispred poslovnih objekata podrazumjeva se postavljanje stolova ispred ugostiteljskih objekata, postavljanje stolova, pultova i tezgi za prodaju ili reklamu, zauzimanje slobodnih površina za postavljanje zabavnih radnji koje se vrše od mjesta do mjesta.
7. pod korištenjem sredstava za pružanje usluga mobilne telefonije, podrazumjeva se stavljanje u funkciju baznih stanica mobilne telefonije, mikrobaznih stanica mobilne telefonije, predajnika (pasivnih repetitora), antena i stubovai elektroenergetskih objekata kojim se vrši prenos električne energije - trafostanice.

Član 4. (Nastanak obaveze)

Taksena obaveza iz člana 2, stav 1. tačka 1. Odluke nastaje danom izdavanja rješenja o registraciji poreznog obveznika, odnosno upisom u jedan od registara (Općina, Općinski sudovi u sjedištima Kantona, nadležnih ministarstava i dr.).

Taksena obaveza iz člana 2, stav 1. tačka 2. do 7. Odluke nastaje u trenutku kada se počinje koristiti predmet ili usluga za čije korištenje je propisano plaćanje komunalne takse.

Član 5. (Obveznici i određivanje visini takse)

Takseni obveznici su sva pravna i fizička lica registrovana za obavljanje djelatnosti koja posluje na području općine Maglaj, odnosno lica, i koja koriste predmet, prostor ili pružaju usluge za čije korištenje je propisano plaćanje komunalne takse.

Iznos komunalne takse za uplatu određuje se prema odredbama Tarife komunalnih taksi općine Maglaj koja je sastavni dio ove Odluke.

Član 6.
(Isticanje firme)

Sva pravna i fizička lica koja obavljaju privrednu djelatnost na osnovu odobrenja nadležnog organa dužna su na vidnom mjestu svih prostora gdje obavljaju djelatnost, odnosno na adresi na kojoj je registrirana djelatnost, istaknuti naziv firme (na sjedište i na poslovnu jedinicu).

Pod nazivom firme podrazumjeva se naziv firme pod kojim je takseni obveznik registriran kod nadležnog organa, sjedište lica i broj poslovne jedinice, odnosno naziv poslovne jedinice, kada se firma ističe na poslovnoj jedinici.

Firma se ističe najkasnije danom početka obavljanja djelatnosti.

Član 7.
(Oslobađanje)

Od plaćanja komunalne takse oslobađaju se:

- Državni zakonodavni i izvršni organi vlasti (Bosna i Hercegovina, Federacija Bosne i Hercegovine, Zeničko-dobojski kanton i Općina),
- Sudski i pravosudni organi,
- Javne ustanove iz oblasti odgoja i obrazovanja, prosvjete, nauke, kulture, informisanja, zaštite kulturne i prirodne baštine, zdravstva (osim privatne zdravstvene prakse), socijalne zaštite i vjerske zajednice,
- Komunalna javna društva koja obavljaju proizvodnju i distribuciju vode za piće, odvoz i zbrinjavanje komunalnog smeća za potrebe građana,
- Sportska udruženja i kolektivi,
- Političke partije,
- Udruženja građana - nevladine organizacije,
- Humanitarne i dobrotvorne organizacije,
- Savezi i organizacije ratnih vojnih invalida, porodice šehida i poginulih boraca i demobilisanih boraca, udruženja dobitnika najvećih ratnih priznanja i udruženja logoraša,
- Samostalni privrednici – invalidna lica iz kategorije amputiraca i paraplegičara,
- Depoi apoteka u objektima porodične medicine i u Domu zdravlja Maglaj u okviru J.U. "Narodna apoteka Maglaj" Maglaj,
- Kreativne, umjetničke i zabavne djelatnosti,
- Takseni obveznici, bilo pravna ili fizička lica, za sve vozne jedinice kojima obavljaju prijevoz za vlastite potrebe,
- Sva fizička i pravna lica koja obavljaju privrednu djelatnost u dijelu Starog grada općine Maglaj. Područje Starog grada općine Maglaj obuhvata sljedeće ulice:
 - Trg Alije Izetbegovića;
 - Donja mahala, sa ulicama: ul. Voljevačka; ul. Čaršijska; ul. Put branilaca; ul. Mustajbega Uzeirbegovića; ul. Jandrošac.
 - Gornja mahala, sa ulicama: ul. Ibrišima Obralića; ul. Zovlje; ul. Čila; ul. 17. novembra 1992.; ul. Tvrđavska; ul. Zagrađe; ul. Moruška; ul. Horina mahala; ul. Orsopovačka; ul. Strmi sokak.

- Fizička i pravna lica koja obavljaju djelatnost registriranu u skladu sa Uredbom o zaštiti tradicionalnih i starih obrta ("Sl. novine Federacije BiH", broj: 66/09, 38/10 i 12/16) na području općine Maglaj (npr. kovačka djelatnost, izrada drvene ambalaže, izrada ukrasnih predmeta od drveta, izrada suvenira, izrada narodnih nošnji, obućarska, saračko-remenarska, opančarska, ručno pletenje, veziljska i izrada čipki, jorgandžijska, ćilimarska i vunovlačarska djelatnost, sahadžijska, dimnjačarska, vodeničarska – uslužno mljevenje žita na tradicionalan način, proizvodnja kreča na tradicionalan način, i druge koje taksativno nisu navedene ali se nalaze u pomenutoj Uredbi).

II PRIJAVA I NAČIN OBRAČUNA KOMUNALNIH TAKSI

Član 8.

(Taksa)

Općinska komunalna taksa se plaća na svaku istaknutu firmu, oznaku, obilježje ili natpis na poslovnim prostorijama i objektima kojim se označava da određeno pravno ili fizičko lice obavlja djelatnost ili zanimanje u skladu sa Zakonom.

Komunalne takse za istaknutu firmu se plaćaju na depozitni račun Budžeta Općine Maglaj broj: 1990460003251634 otvoren kod Sparkasse Bank, šifra općine 060, sa naznakom vrsta prihoda 722322, a za sve ostale takse iz ove Odluke sa naznakom vrsta prihoda 722321, u skladu sa Pravilnikom o načinu uplate javnih prihoda budžeta i vanbudžetskih fondova na teritoriji Federacije BiH, i izvorni su prihod Općine Maglaj.

Član 9.

(Razrez taksene obaveze)

Razrez taksene obaveze je unos iznosa taksene obaveze taksenog obveznika u evidenciju Porezne ispostave Maglaj.

Razrez ili ponovni razrez taksene obaveze Porezna ispostava Maglaj izvršava pod sljedećim uvjetima:

- po prijemu taksene prijave ili izmijenjene taksene prijave koju je pripremio takсени obveznik i u kojoj je obračunao taksenu obavezu;
- po usklađivanju iznosa taksene obaveze prijavljene u taksenoj prijavi bilo da je rezultat kontrole poreznog obveznika donesen ili ne; ili
- po obračunu takse koji je izvršila Porezna ispostava Maglaj ili po podnošenju taksene prijave koju je Porezna ispostava Maglaj pripremila u ime taksenog obveznika i u kojoj je Porezna ispostava Maglaj obračunala taksenu obavezu.

Član 10.

(Podnošenje taksene obaveze)

Prijavu za razrez komunalne takse porezni obveznik je dužan podnijeti Poreznoj ispostavi Maglaj do 31. januara tekuće godine, prema stanju na dan 01. januar tekuće godine, za koju se razrez vrši, odnosno u roku od 15 dana od datuma izdavanja rješenja o registraciji, ako je porezni obveznik registrovao djelatnosti u toku poslovne godine.

Obveznik komunalne takse dužan je Poreznoj ispostavi Maglaj podnijeti prijavu za komunalnu taksu na Obrascu KT 01, koji je sastavni dio ove Odluke i nalazi se u Poreznoj ispostavi Maglaj.

Ukoliko takсени obveznici u propisanom roku ne podnesu prijave, ili daju netačne podatke, prijavu takse izvršit će Porezna ispostava Maglaj u roku od 15 dana, u skladu sa odredbama Zakona o Poreznoj upravi Federacije BiH i podzakonskim aktima.

Član 11.

(Obračun i način plaćanja)

Taksa iz člana 2. ove Odluke se obračunava i plaća na način iz:

- tačke 1. – jednom godišnje, sa rokom plaćanja do 31.12. tekuće godine,
- tačke 2. - dnevno, i to 24 sata prije organizovanja muzike uživo u ugostiteljskim i drugim objektima,
- tačke 3. - dnevno po osobi,
- tačke 4. - mjesečno, na osnovu prijave koju je takseni obveznik dužan da podnese Poreznoj ispostavi Maglaj prije isticanja objava, oglasa i saopštenja na javnim mjestima odnosno zauzimanja i korištenja slobodne površine, taksa se obračunava po m² površine i mora se uplatiti odmah,
- tačke 5. - godišnje, po jednom sredstvu za priređivanje igara na sreću,
- tačke 6. - mjesečno, prema broju stolova koji se koriste u periodu korištenja ljetnih bašta,
- tačke 7. - godišnje, po postavljenom ili instaliranom uređaju.

Član 12.

(Sadržaj taksene obaveze)

Naplatu utvrđenih obaveza po osnovu komunalne takse vrši Porezna ispostava Maglaj u skladu sa odredbama Zakona o Poreznoj upravi Federacije BiH i podzakonskim aktima.

Prijava za razrez komunalne takse sadrži slijedeće podatke: naziv firme, sjedište i adresa taksenog obveznika, brojeve transakcijskih računa otvorenih kod banaka, broj poslovnih jedinica i iznos komunalne takse.

Član 13.

(Umanjenje komunalne takse)

- 1) Pravno ili fizičko lice koje počne da obavlja djelatnost, oslobađa se komunalne takse na istaknutu firmu za prvu godinu poslovanja (prva godina počinje teći od dana izdavanja rješenja o registraciji), a za narednu godinu poslovanja plaćaju taksu u visini od 50%.
- 2) Pravno ili fizičko lice koje prestane da obavlja djelatnost u toku godine, taksa na istaknutu firmu se obračunava samo za broj mjeseci u kojima je obavljao djelatnost.
- 3) Preduzeća sa više poslovnih jedinica, bez obzira dali im je poslovno sjedište na području općine Maglaj, za prvu Poslovnu jedinicu, bilo da je riječ o istoj adresi ili izdvojenoj lokaciji van poslovnog sjedišta, podružnici, filijali, ekspozituri, bankomatu, šalteru, uređaju i slično, na području općine Maglaj, plaćaju obavezu komunalne takse na istaknutu firmu u 100% iznosu, a za svaku narednu Poslovnu jedinicu obaveza se umanjuje za 20% od iznosa propisanog za tu zonu.

Član 14.

(Osnovica komunalne takse)

Osnovica komunalne takse na istaknutu firmu za korištenje uređaja za pružanje usluga mobilne telefonije i elektroenergetskih objekata kojim se vrši prenos električne energije (trafostanice) je jedinstvana i **iznosi 150,00 KM** uz primjenu ostalih mjera za utvrđivanje visine komunalne takse.

Član 15.

(Visina komunalne takse)

- 1) Mjerilo za utvrđivanje visine komunalne takse na istaknutu firmu i za korištenje uređaja za pružanje usluga mobilne telefonije i elektroenergetskih objekata kojim se vrši prenos električne energije (trafostanice)su: koeficijent položajne pogodnosti, zona u kojoj je firma istaknuta odnosno zona u kojoj su postavljeni uređaji za pružanje usluga mobilne telefonije i elektroenergetskih objekata kojim se vrši prenos električne energije (trafostanice) i veličina pravnog lica u smislu kriterija o razvrstavanju pravnih lica na osnovu člana 4. Zakona o računovodstvu i reviziji Federacije Bosne i Hercegovine („Službene novine Federacije BiH“, broj: 83/09).
- 2) Pod pogodnošću podrazumijeva se obim i stepen izgrađenosti i uređenosti i položaja zemljišta komunalnim građevinama i instalacijama, saobraćajne povezanosti, vrste i kapaciteta objekta za svakodnevno i periodično snabdijevanje, stepena pokrivenosti naselja objektima za zdravstvo, obrazovanje i kulturu i prirodnih uslova.
- 3) Koeficijent položajne pogodnosti određen je jedinstveno za sva pravna i fizička lica tarifnog broja 1. Tarife općinske komunalne takse po zonama urbanog dijela općine Maglaj u zavisnosti od pripadnosti određenog poslovnog prostora na kome je istaknuta firma odnosno zona u kojoj su postavljeni uređaji za pružanje usluga mobilne telefonije i elektroenergetskih objekata kojim se vrši prenos električne energije (trafostanice) u skladu sa **Odlukom o građevinskom zemljištu općine Maglaj („Službene novine Općine Maglaj“, broj: 4/19 i 6/19)**.

Spisak ulica, MZ-a i naseljenih mjesta po zonama, u skladu sa Odlukom o građevinskom zemljištu općine Maglaj, čini sastavni dio ove Odluke i sačinjen je od strane Službe za urbanizam, geodetske i imovinsko pravne poslove Općine Maglaj.

Koeficijent položajne pogodnosti po zonama utvrđuje se na slijedeći način:

Zone u skladu sa Odlukom o građevinskom zemljištu općine Maglaj	I	II	III	IV	V	VI
Koeficijent položajne pogodnosti po zonama	1,35	1,30	1,25	1,20	1,10	1,00

Koeficijent veličine pravnog lica u smislu kriterija o razvrstavanju pravnih lica na osnovu člana 4. Zakona o računovodstvu i reviziji Federacije Bosne i Hercegovine („Službene novine Federacije BiH“, broj: 83/09) određen je u tarifnom broju 1. i 7. Tarife općinske komunalne takse sa oznakom (KV) – pravna lica, sa posljednjim završnim obračunom ovjerenim kod Finansijsko-informatičke agencije (FIA) Federacije BiH.

Prema odredbama Zakona o računovodstvu i reviziji Federacije Bosne i Hercegovine:

- **Mala pravna lica** su ona koja ispunjavaju najmanje dva od slijedećih uslova:
 - prosječan broj zaposlenih je manji od 50,
 - prosječna vrijednost poslovne imovine na kraju poslovne godine je manja od 1.000.000,00 KM,
 - ukupan godišnji prihod je manji od 2.000.000,00 KM.

- **Srednja pravna lica** su ona koja na dan sastavljanja finansijskih izvještaja ispunjavaju najmanje dva od slijedećih uslova:
 - prosječan broj zaposlenih u toku godine je od 50 do 250,
 - prosječna vrijednost poslovne imovine na kraju poslovne godine iznosi od 1.000.000,00 KM do 4.000.000,00 KM,
 - ukupan godišnji prihod iznosi od 2.000.000,00 KM do 8.000.000,00 KM.
 - **Velika pravna lica** su ona koja prelaze gornje vrijednosti iz najmanje dva uslova iz prethodnog stava. Velika pravna lica u smislu navedenog zakona su banke, mikrokreditne organizacije, štedno-kreditne zadruge, društva za osiguranje, leasing društva, društva za upravljanje investicionim fondovima, društva za upravljanje obaveznim odnosno dobrovoljnim penzijskim fondovima, brokersko-dilerska društva i druge finansijske organizacije.
- 4) Koeficijent položajne pogodnosti utvrđen je zavisno od pogodnosti koje se obezbjeđuju obvezniku komunalne takse u zoni u kojoj je istaknuta firma odnosno zona u kojoj su postavljeni uređaji za pružanje usluga mobilne telefonije i elektroenergetskih objekata kojim se vrši prenos električne energije (trafostanice) odnosno obavlja djelatnost.
- 5) Visina komunalne takse na istaknutu firmu za:
- pravna lica određuje se množenjem jedinstvene osnovice komunalne takse na istaknutu firmu i za korištenje uređaja za pružanje usluga mobilne telefonije i elektroenergetskih objekata kojim se vrši prenos električne energije (trafostanice) sa koeficijentom položajne pogodnosti i koeficijentom veličine pravnog lica u smislu kriterija o razvrstavanju pravnih lica na osnovu člana 4. Zakona o računovodstvu i reviziji Federacije Bosne i Hercegovine („Službene novine Federacije BiH“, broj: 83/09), a za
 - fizička lica određuje se množenjem jedinstvene osnovice komunalne takse sa koeficijentom položajne pogodnosti.

Član 16. **(Povrat više uplaćene takse)**

Povrat više uplaćene komunalne takse na istaknutu firmu vrši se prema odredbama Pravilnika o načinu uplate javnih prihoda budžeta i vanbudžetskih fondova na teritoriji Federacije BiH.

III TARIFA KOMUNALNIH TAKSI OPĆINE MAGLAJ

Član 17. **(Tarifni brojevi)**

Tarifni broj 1.

Obveznik plaćanja općinske komunalne takse je svako pravno ili fizičko lice (registrirano u nadležnoj općinskoj službi ili kod nadležnog ministarstva) koja imaju istaknutu firmu, oznaku, obilježje ili natpis na poslovnim prostorijama i objektima, odnosno postavljeni uređaji za pružanje usluga mobilne telefonije i elektroenergetskih objekata kojim se vrši prenos električne energije (trafostanice) i kojim se označava da ista obavljaju djelatnost ili zanimanje u skladu sa Zakonom.

I - Fizička lica (registrirana u nadležnoj općinskoj službi ili kod nadležnog ministarstva)

Za svaku istaknutu firmu, oznaku, obilježje ili natpis na poslovnim prostorijama i objektima, kojima se označava da određeno fizičko lice (registrirano u nadležnoj općinskoj službi ili kod nadležnog ministarstva) obavlja izvjesnu privrednu djelatnost ili zanimanje, obračunava se i plaća se godišnja taksa množenjem jedinstvene osnovice komunalne takse na istaknutu firmu sa koeficijentom položajne pogodnosti, kako slijedi:

Osnovica komunalne takse na istaknutu firmu 150,00 KM	KOEFICIJENT POLOŽAJNE POGODNOSTI PO ZONAMA					
	I	II	III	IV	V	VI
	1,35	1,30	1,25	1,20	1,10	1,00

II - Pravna lica

Za svaku istaknutu firmu, oznaku, obilježje ili natpis na poslovnim prostorijama i objektima, kojima se označava da određeno pravno lice obavlja izvjesnu privrednu djelatnost ili zanimanje, odnosno postavljeni uređaji za pružanje usluga mobilne telefonije i elektroenergetskih objekata kojim se vrši prenos električne energije (trafostanice), obračunava se i plaća se godišnja taksa množenjem jedinstvene osnovice komunalne takse na istaknutu firmu sa koeficijentom položajne pogodnosti i koeficijentom veličine pravnog lica u smislu kriterija o razvrstavanju pravnih lica na osnovu člana 4. Zakona o računovodstvu i reviziji Federacije Bosne i Hercegovine („Službene novine Federacije BiH“, broj: 83/09), kako slijedi:

R/B	KOEFICIJENT VELIČINE PRAVNOG LICA	KOEFICIJENT POLOŽAJNE POGODNOSTI PO ZONAMA					
		I	II	III	IV	V	VI
1	MALA PRAVNA LICA KV = 2	1,35	1,30	1,25	1,20	1,10	1,00
2	SREDNJA PRAVNA LICA KV = 5	1,35	1,30	1,25	1,20	1,10	1,00
3	VELIKA PRAVNA LICA KV =10	1,35	1,30	1,25	1,20	1,10	1,00

Tarifni broj 2.

- Za priređivanje muzike uživo u ugostiteljskim objektima plaća se komunalna taksa dnevno u iznosu od 50,00 KM.
- Za priređivanje muzike uživo duže od jednog dana za svaki naredni dan plaća se komunalna taksa u iznosu od 10,00 KM.
- Za priređivanje koncerata, proslava i sl. manifestacija u zatvorenom prostoru plaća se komunalna taksa u iznosu od 100,00 KM.
- Za priređivanje koncerata, proslava i sl. manifestacija na otvorenom prostoru plaća se komunalna taksa u iznosu od 100,00 KM.

Tarifni broj 3.

- Za svako noćenje u objektima za smještaj gostiju (hoteli, moteli, prenočišta, kampovi i sl.) plaća se komunalna taksa po osobi u iznosu od 2,00 KM.

Tarifni broj 4.

Za isticanje objava, oglasa i saopštenja na javnim mjestima plaća se jednokratna taksa i to:

- za seriju do 100 komada 50,00 KM,
- za seriju preko 100 komada 100,00 KM,
- za postavljanje stalnih panoa, billboard reklamni panoa i display-a na 1 m² plaća se taksa mjesečno 2,50 KM. Isticanje objava, oglasa i saopštenja na javnim mjestima vrši se u skladu sa odredbama Odluke kojom se tretira komunalni red na području općine Maglaj.

Tarifni broj 5.

- Za držanje sredstava za priređivanje zabavnih igara (fliperi, video igre, pikado, bilijar, i slično) plaća se komunalna taksa godišnje po jednom sredstvu za priređivanje zabavnih igara u iznosu od 200,00 KM.
- Za držanje sredstava za priređivanje igara na sreću (ruleti, poker aparati, i slično) plaća se komunalna taksa godišnje po jednom sredstvu za priređivanje igara na sreću u iznosu od 1.000,00 KM.
- Za držanje tombole i slično po priređivačkom mjestu iznos od 200,00 KM.

Tarifni broj 6.

- Za postavljanje stolova ispred ugostiteljskih objekata plaća se komunalna taksa po stolu dnevno 0,30 KM gdje se ne toče alkoholna pića, 0,50 KM gdje se toče alkoholna pića.
- Za postavljanje stolova, pultova i tezgi za prodaju i reklamu knjiga, štampe, bižuterije, razglednica, cvijeća, voća i povrća, prehrambenih roba ili bilo kojih drugih proizvoda, taksa se plaća po prodajnom mjestu – dnevno 2,00 KM.
- Za zauzimanje slobodnih površina za postavljanje zabavnih radnji koje se vrše od mjesta do mjesta, taksa se plaća po m² zauzete površine dnevno 1,00 KM.
- Sva pravna i fizička lica koja su po ovoj Odluci razvrstana u VI zonu, a svoju obavezu po osnovu komunalne takse plaćaju shodno Tarifnom broju 6. stav 1., obavezu plaćaju u iznosu umanjenom za 50% ovog tarifnog broja.

Tarifni broj 7.

Za korištenje uređaja za pružanje usluga mobilne telefonije i elektroenergetskih objekata kojim se vrši prenos električne energije – trafostanice, i to:

- Bazna stanica mobilne telefonije,
- Mikrobazna stanica mobilne telefonije i kablovskih operatera,
- Predajnici (pasivni repetitori), antene i drugi uređaji na stubovi,
- Trafostanica 220/110/35/10 KV,
- Trafostanica 110/35/10 KV,
- Trafostanica 35/10 (20) KV,
- Trafostanica 10 (20)/0,4 KV,
- Stubna trafostanica,

plaća se komunalna taksa korištenjem tabele za pravna lica:

R/B	KOEFIČIJENT VELIČINE PRAVNOG LICA	KOEFIČIJENT POLOŽAJNE POGODNOSTI PO ZONAMA					
		I	II	III	IV	V	VI
1	MALA PRAVNA LICA KV = 2	1,35	1,30	1,25	1,20	1,10	1,00
2	SREDNJA PRAVNA LICA KV = 5	1,35	1,30	1,25	1,20	1,10	1,00
3	VELIKA PRAVNA LICA KV =10	1,35	1,30	1,25	1,20	1,10	1,00

Član 18.
(Nadzor i kontrola prijave)

Nadzor i kontrolu prijave, obračuna i plaćanja općinske komunalne takse vrši Porezna ispostava Maglaj u saradnji sa općinskom Službom za privredu, finansije/financije i razvoj poduzetništva.

Porezna ispostava Maglaj i Općina Maglaj, odnosno nadležne općinske službe, obavezni su međusobno saradivati, bez nadoknade, te su dužni razmjenjivati informacije koje su relevantne za obavljanje dužnosti koje su povjerene poreznim organima.

Obavezuje se Porezna ispostava Maglaj da Službi za privredu, finansije/financije i razvoj poduzetništva dostavi izvještaj o poreznim obveznicima koji su izvršili prijavu komunalne takse u roku od 15 dana od dana isteka roka za prijavu iste.

Obavezuje se Služba za privredu, finansije/financije i razvoj poduzetništva Općine Maglaj da u saradnji sa Poreznom ispostavom Maglaj da do 15. januara tekuće godine usaglasi spisak registriranih pravnih i fizičkih lica na području općine Maglaj, poreznih obveznika za plaćanje općinske komunalne takse.

Obavezuje se Služba za urbanizam, geodetske i imovinsko pravne poslove Općine Maglaj da do 15. januara tekuće godine redovno dostavlja Poreznoj ispostavi Maglaj spisak korisnika uređaja za pružanje usluga mobilne telefonije i elektroenergetskih objekata kojim se vrši prenos električne energije – trafostanice iz člana 17. Tarifni broj 7. sa podacima: nosiocima vlasništava nad navedenim uređajima, brojem uređaja i zoni u kojoj se isti pojedinačno nalaze.

IV KAZNE NE ODREDBE

Član 19.
(Visina kazne)

- 1) Novčanom kaznom u iznosu od 500,00 KM do 5.000,00 KM kaznit će se za prekršaj pravno lice koje u roku propisanom ovom Odlukom i Tarifom komunalnih taksi, koje se plaćaju na području općine Maglaj, ne prijavi ili da netačne podatke ili ne plati propisanu komunalnu taksu (član 10. i 11. Odluke).
- 2) Novčanom kaznom u iznosu od 100,00 KM do 2.000,00 KM kaznit će se za prekršaj odgovorno lice u pravnom licu, koje u roku propisanom ovom Odlukom i Tarifom komunalnih taksi, koje se plaćaju na području općine Maglaj, ne prijavi ili da netačne podatke ili ne plati propisanu komunalnu taksu (član 10. i 11. Odluke).
- 3) Novčanom kaznom u iznosu od 100,00 KM do 2.000,00 KM kaznit će se za prekršaj fizičko lice - vlasnik samostalne radnje koji u propisanom roku ovom Odlukom i Tarifom

komunalnih taksi, koje se plaćaju na području općine Maglaj, ne prijavi ili da netačne podatke ili ne plati propisanu komunalnu taksu (član 10. i 11. Odluke).

- 4) Pored izrečenih kazni, Porezna ispostava Maglaj će vršiti prinudnu naplatu takse u skladu sa Pravilnikom o procedurama prinudne naplate poreznih obaveza u Federaciji BiH.

V PRELAZNE I ZAVRŠNE ODREDBE

Član 20.

(Započeti neokončani postupci)

Postupci razreza visine iznosa takse koji nisu pravosnažno okončani do dana stupanja na snagu ove Odluke, bit će okončani prema odredbama ove Odluke o komunalnim taksama Općine Maglaj.

Član 21.

(Primjena Odluke)

Stupanjem na snagu ove Odluke prestaje važiti Odluka o komunalnim taksama i tarifi taksa na istaknutu firmu i drugih komunalnih taksa ("Službene novine Općine Maglaj", broj: 3/13, 6/13, 6/14, 12/17, 4/20 i 7/20).

Član 22.

(Primjena Odluke)

Za provođenje ove Odluke zadužuje se Kantonalni porezni ured Zenica – Porezna ispostava Maglaj.

Služba za privredu, finansije/financije i razvoj poduzetništva Općine Maglaj će vršiti povremene kontrole prijave, te usklađivati podatke sa Poreznom ispostavom Maglaj.

Član 23.

(Stupanje na snagu)

Ova Odluka stupa na snagu danom donošenja i ima se objaviti u "Službenim novinama Općine Maglaj".

Broj: 02-04-1-344/20
Maglaj, 30.12.2020.godine



PREDSJEDAVAJUĆA
Svjetlana Zamboni